



STINAPA TA INFORMA

BONEIRU SU TESORO MUNDIAL

Bida riba un isla chikitu manera Boneiru tin algu speshal. E isla ta nada mas ku un skupí riba e mapa di mundu. Pero na mes momentu nos bida diario ta tuma lugá riba e par di shen kilometer kuadrá aki. Pa nos Boneiru ta e sentro di mundu! E aspekto mas importante di un isla di mes ta su isolashon. Nos ta rondoná dor di Mar Karibe. Un biaha pa aña algun shen hende ku kurashi ta landa bai Klein Bonaire, i nos piskadónan ta riska di bai un tiki mas leu den nan botonan chikitu. Pero si ta di bèrdat bo ke bai for di nos isla, mayoria biaha bo tin ku dependé riba avion. Pa naturalesa e isolashon aki tin konsekuensha grandi. Hopi bestia i mata no por bai for di e isla di ningun manera. Nan ta mará pa semper na nos isla. I asina por sosodé ku atraves di tempu riba un isla asina, forman di bida ta desaroyá ku no ta eksistí niun otro lugá na mundu, òf kisas riba algun otro isla chikitu den besindario. Den sistema sientífiko nos ta yama e bestia òf matanan asina un 'sorto endémiko', of "sup-sorto". Na Boneiru nos tin algun di e sorto endémiko ei. Mas ku nos ta pensa. Riba nos isla nos tin kokolishi, insekto, araña, rèptil, para, raton dj'anochi i palu ku bo no ta haña na niun otro lugá na mundu. Kemen nos por ta un tiki orguyoso riba esei. I fuera di esei nos mester trata nan ku kuidou. Pasobra si nan disparsé aki, nan ta disparsé di mundu henter. Bo ta birando interesá ta kua sorto endémiko nos ta papiando di dje? Wèl, mi ta spera ku bo no ta keda desapuntá. Pasobra hopi di e mata i bestianan aki nos ta mira tur dia. Bo ta haña nan masha komun. Ta trata aki di entre otro esakinan: prikichi, chuchubi spañó, para di misa, trupial, chuchubi i e mòfi. Manera a ser bisá kaba, nos ta haña nos sortonan endémiko i sup-sortonan dor di e posishon isolá di nos isla. E evolushon ta tuma su rumbo propio aki. Pero esei ta nifiká tambe ku nos naturalesa ta hopi delikado. Pèrdida di biodiversidat ta tuma lugá dor ku e área di biba di un sierto sorto ta disparsé òf ta ser partí den yen di pida chikitu. Hopi biaha dor di influensha humano. Pues, no solamente nos mester kuida nos sortonan di mata i bestia, pero tambe nan áreanan di biba. T'asina e tesoro ku Boneiru ta, lo keda eksistí p'e mundu aki.

Skirbí pa V. van Baronie

Pa mas informashon i reakshon: STINAPA, telefon 717 - 8444, info@stinapa.org

NOS TA BIBA DI NATURALESA



Traha huntu na un desaroyo duradero pa Boneiru